

Hakkiwa Adamganabe Dunya Ngaro Wowurtəgənama

Katiwu Kura

Adamgana woso kalkal ye kamanzəga nəmngalwo hakkiwa-a nambe-a kənzambibelan kozənyi ye.

Lardəwa Tawakkata Dunyabedə hakkiwa adamganabe ndubesoga haptaa-a nzətkawo-a nzəliwo-asoro tarai cizə dazəna. Tarai cizə datənzə adə Tawakam Lardəwa Tawakkata Dunyabebe duwo nəmkam ummawa dunyabebe suro hakkiwa adamganabe-a kuru suro daraja-a nəmngalwo-a ummabe yitatawatsəgənadəben culuwo.

Suro Hakkiwa Adamganabe Dunya Ngaro Wowurtəgənadəben Lardəwa Tawakkata Dunyabedəye futu kəskelan asutinro hakkiwa duwo kam wosoro kalkalro kartaa adəga bayangono.

Hakkiwa anyi nyiro kartaa.

Sandi anyi hakkiwanəm

Sandiga tigənəmro fatkəgəne. Banane sandiga hapkəgəne ye liwe ye kəlanəm-a ummawa amanəm gade gapsəna-asoro.

Yitagattəgə

Adəgaima tada adamganabebe nəmngalwonzə kambaata adə-a nəmnduasoo kalkalnə-a hakkiwanzə Alanjo-adə shima ferno nəmkambe-a jirebe-a nəlefabe-aro dunya ngason asutəna,

Adəgaima hakkiwa adamganabero cistəgə ba-a fallaktə-abe sawowuro kəndowa halye kurzənyi waazə hangal adamganabero karega rozəgəna, kuru dunya duwo suron adamganasoye tamtam hakkinza manabe-a nzasarabe-a kuru nambe duwo dalil baaro citə-a jero-abadə shima awo talaawaye təmazana woro warmowotə,

Adəgaima awo məradətənədə susu adamganaga dunon təkəkə nəmzaləm-a njokuno-a kəriwutəbedəro howum maibeye hakkiwanzaga səliwodəma,

Adəgaima awo məradətənədə tawaa-a nəmkam-a indikate lardəwaben haptaadəma,

Adəgaima ummawa Lardəwa Tawakkata Dunyabeye suro Tawakamdəben kamburshenza kəla hakkiwa adamganaben nanazaana, kəla daraja-a nəmngalwo-a adamganabe-a kəla kamu-a kwa-a hakkinza kalkal-aben kasadə gozana tamtam-a kəndəga ngəla-a hapsaa nambe gayaga fandoro,

Adəgaima Lardəwa Memba Kaapkadəbe woso wadəga gozana, tawaa Lardəwa Tawakkata Dunybemben, daaraja ndubeso haptaa-a hakkiwa adamganabe-a nambe gaya lajiptə-a galtəro,

Adəgaima wadə adəga yitagatəgə nankaro hakkiwa-a nambe anyi-a asutadə awoye gaya linta,

Adə Nankaro

Samno Kura Dunyabedəye

Hakkiwa Adamganabe

Dunya Ngaro Wowurtəgəna Adəga

warmazəgə

shima mizan ummawa-a lardəwa-a duksoye yitagattəgəbe wo, daji daryenzədə ndu-a nduana-aso fellawan kunte, Wowur adəga karəgən roza, ndusoro yikkəlio-a ilmoṭəgə-an hakkiwa-a nambe anyi-abe nəmgayanza haptaro, suro lardəbe-a indikate lardəwabe-ason ndusoye kalkalro asuzə lajipsə, suro ummawa Lardəwa Memba Karapkadəbe-a suro ummawa gade sədiyanzalan dawuna-ason.

Babu 1

Adamgana woso kambe katambo ye daraja-a hakkiwa-ason kalkalye. Hankal-a nazaru-asoro kəzəpkə ye suro hal nəmharamiben kamazasoga letaiyin ye.

Babu 2

Hakkiwa-a nambe a suro Wowur adəben dəganadə ndu-a nduana-aso kartaa, gayirtə futubibema baaro, gayirta alama jilibeso, kadigəbeso, alagəbeso, təlambeso, adinbeso, siyasabeso au rayiwu, lardə gade au kaduwu gade, kənganti, tambo au awowa laa gade anyiga samunzəna.

Anyibe ngawoman nduma kəla siyasaben kal, kəntəwoben kal au daraja dunyalabe sawawuro kal kərye au lardə kamdə dəganabe sawawuro gayirtinba. Lardə shi gultənama adə kərməi kəlanzəben karga, amanaro musko lardə gadeben karga, kəlanzəlangənyi karga au sədiya kaidawa kəntəwobe laan karga yaye kal.

Babu 3

Ndu yaye hakkinzā kēla ronzā-a nēmkambenzā-a nēlefa kēlanzā-aben mbeji.

Babu 4

Nduma kēnji au kaliyaro tēgandinba, nēmkēnjiro gērtā-a kēnji lado-aso awostā ye daptā ye.

Babu 5

Nduma njokunoso, nēmkēladoso, shimaso, azawaso, gēnatēginba.

Babu 6

Ndu yaye hakkinzā ndaran yaye shiga kamro asutabe mbeji fuwu howumbelan.

Babu 7

Nduso fuwu howumben kalkal ye kuru gayirta baaro howumye sandiga sēliwin ye. Nduso hakkinzā nzēliwobe mbeji gayirtalan fallaktā Wowur adābe sawawuro-a kēla lan laa gade gayirtadā nankaro waazāna-alan.

Babu 8

Ndu yaye hakkinzā sēlwi sandāna mataabe mbeji shara rakkata lardēbelan kēla hakkinzā gaya linta dusturye au howumye shiro cina nāmtenaben.

Babu 9

Nduma dalil baaro kēntaso, jeroso, lardēn dutaso ba.

Babu 10

Ndu yaye hakkinzā futu mēradēzēnaro shiga shara naptā kēlanzābe walama baa ye jireā yebe kērantabe mbeji kēla hakkinzā-a kaidawanzā-a kuru awowa gade shara zēganyī-a tawattaaben.

Babu 11

Ndu yaye ngawo ayawu sādēnaben angērdā hakkinzā kawu shiro fuwu sharaben ngawo sēliwo mēradētēna shiro sadēnaben ayawunzēga tawatsaginro.

Nduma kēla awo abima gēnyiben ayawuro tētāinba futubīn waano yaye ayawudā ayawuro walzēnyiga, sādīya howum lardēben au indikate lardēwaben, sa ayawu adā tādēnaladēn. Biya gēnatēginro walwono yaye ayawu sadēn tādēnadēga kozēna gēnatēginba.

Babu 12

Ndu kēla baaro wujirwa kēlanzābema, yalwanzābema, au lamar lenēm-arenzābemarō ci tēkinba, biya kēla nēmkamnzā-a darajanzā-abe nankaro fitēnatinba. Ndu yaye hakkinzā howumye shiga nzēlifobe mbeji kēla dalil baaro wujirwanzāro ci nzēkko-a fitēnatā-aben.

Babu 13

Ndu yaye hakkinzā famno-a fato gar-abe mbeji suro dērinēm-kēlle lardē ndasoben yaye.

Ndu yaye hakkinzā lardēbi yaye luwum koltābe mbeji, lardē kaanzēn kunten, kuru lardēnzāro waltaabe ye mbeji.

Babu 14

Ndu yaye hakkinzā lardēwa gaden nafaka nzēliwo kēlanzābe nankaro mata-a fando-abe mbeji.

Hakki adā ayawuwa gade siyasaa letanyi au bigēwa gade nya-a kasadā-a Lardēwa Tawakkata Dunyabea kēla kēlzanyiro faidatinba.

Babu 15

Ndu yaye hakkinzā nēmkam lardēbenzā mbeji.

Nduma dalil baaro nēmkam lardēbenzā adēga daptinba ye hakkinzā duwo nēmkam lardēbenzā faltābe yega daptinba.

Babu 16

Kamuwa-a kongawa-a wuraata angalla woso, kalangi abibema baaro jilibema, lardēbema, au adin

gadebema , hakkinza nyiya kändobe-a yal fandobe-aso mbeji. Sa nyiga kändobelan sandi indiso hakkinza kalkal kuru adəgaima sa gadetəbe ishiya ye.

Nyyadə sai kasada sandi indi kamudə-a kwadə-abe mbejilan duwo tədin.

Kəndəga kamun kwanbedə shima badiyaram məradəgata gaya ummabe wo kuru sandiga kəndəgaram-a kərye-ason səlifodə hakkinza.

Babu 17

Ndu yaye runzəlaro razəgə gantodə hakkinzə kuru adəgaima shi-a am-a kəltəm gantodə ye.

Nduma dalil baaro razəgənzəga firtinba.

Babu 18

Ndu yaye hakkinzə nazaru kändobe-a tawakarbe-a adinbe-a mbeji, suro hakki adəben nambe adinnzə au nzasaranzə faltəbe-a nambe shi tilonzə au suro jamuwubelan fetero au ashirlan adinzə au nzasaranzə yikkəlio-a kəndo-a abuttə-a lajiptə-alan tartaabe mbeji.

Babu 19

Ndu yaye hakkinzə rayiwu-a bayan kəndo-abe mbeji, suro hakki adəben nambe rayiwunzə kalma baaro bayanjin kuru shilan nzəra majin ye səmoyin ye kuru hawarazəgin futu hawarbe jilibin yaye kəlangai baaro.

Babu 20

Ndu yaye hakkinzə suro nəlefaben samno sapta-a maamala kəndo-abe mbeji.

Nduma dunon karapka kasatsənyiro nzəkko ba.

Babu 21

Ndu yaye hakkinzə suro gumnati lardənzəbero ci nzəkobe mbeji, shi kəlanzə au wokkilnzə futu kalkallan kartənamben.

Ndu yaye hakkinzə suro lardənzəben jamaro tunotobe mbeji.

Kasada jamabedə shima fərtə kəntəwo gumnatibero walzə, kasada adə suro karno gondua ye jirebe ye lardə kəpson ndu-a nduana-asoye sədin ye kuru kuriya suro ashirlan au ashirga samunzənalən tədinbelən bayantə.

Babu 22

Ndu yaye kəla shi memba ummabedən, hakkinzə nzəliwo-a asutə-abe mbeji, kasadə lardəbembən au tawaa indikate lardəwabembən futu fasal-a nyama-a lardədəbe ləgatarro, razəgə-a nəmkamnə-a təgalisə baaro yita fuwutəgə.

Babu 23

Ndu yaye hakkinzə cida kändobe mbeji, cida səragəna karzə kəndo-a futu kaida sandənalən kəndo-a kurumason kaidu cida babelan shiga nzətakawo-a.

Ndu yaye, gayirtə futubibema baaro, hakkinzə cida sədəna ləgatarro shiga alutəbe mbeji.

Ndu yaye cidama sədinga hakkinzə awo alutəginmadə shi-a yalwanzə-a futu darajanza nəmadamganabe ləgatarro sandiga cittənnama alutəgəbe mbeji kuru nzəra yaye nasha laa jamaro nafaka kənjobelən mbejiga diwijnba.

Ndu yaye hakkinzə karapka cidawube koktabe au kəlanzə nzəkko mbeji tamtam kəlanzəbe nzəliwo nankaro.

Babu 24

Ndu yaye hakkinzə tusu-a kundushi kəndo-abe mbeji, loktu cidabe angalbe kurzəna-a batalla biyaa-a kunten.

Babu 25

Ndu yaye hakkinzə futu kalkalro məradətənaro kəndəgabe nəlefa-a kəndəga kəji shi kəlanzə-a yalwanzə-abe mbeji, hatta kəmbu-a kənza-a kazəmu-a fato-a, kurun-a awowa gade tamtambe məradətənən kunten-a, kuru hakkinzə shiga nzətkawobe mbeji wanee cidaba laa, kundondi laa, nəmmaskin laa, nəmkamba laa, ngəli kurwu laa au kəndəgaram kun-balinbe laaye shiro kənteri cuwutoga.

Ya kændewu-a tada tiwal-aso ngəlaro cistəgə mərədəzana. Duli dukso, nyiyaa au nyiya baalan katambo yaye səliwo fandodə hakkinza.

Babu 26

Ndu yaye hakkinzə shiro ilmu kənjobe mbeji. Ilmu gultəna adə de sulro tin, gananzə yaye ilmu badiyarambe-a fuwunzəbe mərədətəna-a. Ilmu badiyarambe gultəna adə kənjonzədə mburo walzəna. Ilmu nzundube-a shanabe-adə ndarason mbeji ye təwandin yero tədə kuru adəgaima ilmu sandin fuwunbedə ye ndusoye səwandə kərajinro walzə natəgəye suwudiya.

Ilmudə nəmkam kamilga garta-a dunoatə hakkiwa adamganabe-a nambenzə-a nganzazəro walzə. Asutu-a kanadi-a nəmkam-a indikate lardəwaben fuwuzəgin. Nəmgade jilibe au adinbe baro sədin, kuru lardəwa Tawakkata Dunyabeye cidanzə nəlefa rotabedəga yitafuwuzəgin.

Yaso Awasoye hakkinza burwoza jili ilmube mərədəzana karza dulinzaro gultəgəbe mbeji.

Babu 27

Ndu yaye hakkinzə kal baaro lamarwa adabe jamabelan gaam luwobe mbeji, adawadən tamtam fantə-a yasan ngalwotəgənzəro kəla nəkko-a kuru faidanzən riwa fando-a.

Ndu yaye hakkinzə nəzəliwobe mbeji kəla lamar bərzəm-a kəla ro-aben cida nasha kimiyaben kal, ruwoben kal au muskon tandoben kal shima kunkunzə sutuluiya.

Babu 28

Ndu yaye hakkinzə howum duwo hakkiwa-a nambe-a suro Wowur adəben dəganadəga yita bayanzəginma gantobe mbeji.

Babu 29

Ndu yaye cida jama suron dəgana sandi baslan nəmkamnə kaima baaro yitafuwuzəgin adəbe kəndobe mbeji.

Suro hakkiwanzə-a nambenzə-a yitagatsəginben, ndu yaye kəlangai howumye gənazənaro dazəgin təganasməro dalil hakkiwa-a nambe-a jama gade gapsanadəbe asutə darajatə-a mərədəwa lamarwa bərzəmbe-a kaida suro jamaben kəndəgəbe-a suro naptəram demokəradiyaben nəlefa fando-a.

Hakkiwa-a nambe-a anyi futubiman dalil Lardəwa Tawakkata Dunyabeye ferzənadən nguron dalilwa gadero faidatinba.

Babu 30

Abima suro Wowur adəben fasaranzə lardəro, samnaro au kamro kartaaro tənəyi, amari hakki abima kəndobe au nya laa nganzatəbe kəla hakkiwa-a nambe-a suro adəlan dəganadəben bannaro fasartənəyi ye tənəyi ye.